

Marklin

918

5/1



Digitized by the Internet Archive  
in 2018 with funding from  
Wellcome Library

<https://archive.org/details/b30366124>

DISPUTATIO PHYSICA  
DE  
INTENSITATE LVCIS.

---

HANC,  
GRATIA DEI ADSISTENTE,  
CONSENSV  
AMPLISSIMAE FACULTATIS PHILOSOPHICAE,  
PRAESIDE  
GODOFREDO PLOVCQVET,

LOGICES ET METAPHYSICES PROFESSORE P. O.  
ACADEMIAE SCIENTIARVM REGIAE BEROLINENSIS  
MEMBRO,

PRO GRADV MAGISTRI PHILOSOPHIAE  
LEGITIME OBTINENDO

DEFENDET  
DIE SEPTEMBR. MDCCLIV.  
H. L. Q. C.

AVCTOR RESPONDENS  
IOHANNES FRIDERICVS MAERKLIN,  
*Reichenbaco-Caluenfis,*

SER. STIP. ET PHILOS. CAND.

---

TVBINGAE  
LITTERIS ERHARDIANIS.







§. I.

**T**ractaturus de Intensitate lucis quædam de luce & densitate in genere præmittenda esse arbitror, ut facilius reddatur in sequentibus explicatio, quæ hisce notionibus erit superstruenda.

§. II.

De natura & propagatione lucis magna est apud Physicos hypothesium diuersitas, cum ingenia humana subtilissimum hoc & valde reconditum argumentum hætenus sæpe variisque modis explorarint, sed nondum plene persecuta fuerint. Præclaram viam ad inquisitionem naturæ siue formæ lucis monstrauit BACO DE VERVLAMIO l. 4. de augmentis scientiarum ed. Argentoratensis p. 227, & hanc inquisitionem inter desiderata sua posuit. Nostreis temporibus huic argumento non defuit perspicacia insignium Philosophorum, CARTESII & NEWTONI, qui tamen in sententia dicenda multum a se inuicem discesserunt. Omnes autem Philosophi, qui formam lucis determinare ausi fuerunt, in duas classes distribui possunt. Nam vel



statuunt, lucem esse singularem materiam; quæ antiquissima est sententia, & auctoritate Sacrarum Literarum GEN. I. v. 3.4. confirmatur: Vel negant lucem esse materiam, siue vocent eam accidens, siue sit ipsis impulsus materiæ æthereæ secundi elementi factus a materia æthereæ primi elementi.

### §. III.

In propagatione lucis ab igne determinanda variæ iterum hypotheses occurrunt. Nolo prolixus esse in illis recensendis, cum id jam abunde præstitum fuerit a BEATO DN. PROF. KRAFTIO in *Phys.* P. III. §§. 58. 59. 62 - 68. Sufficiat adnotare duas maxime vias esse, quas Philosophi in hoc negotio ingressi sunt. CARTESIUS, acutissimus cæterum naturæ scrutator non modo radiationes sed etiam propagationem lucis tantum ad Mechanicam retulit, sed non satis feliciter, de quo vid. PERILLVSTRIS DN. DE MAVPERTVIS *Essai de Cosmologie* p. 88. & B. DN. PROF. KRAFTIVS l. c. NEWTONVS vero difficultatibus huius sententiæ perspectis principium quoque Mechanica superius assumpsit, lucemque per effluvia corporea propagari existimauit.

### §. IV.

Iuuabit hic experientias de luce & igne adferre, vt inde pateat, quid sit lux & quomodo discrepet ab igne, quantum quidem ex istis concludere licebit. Experientia prima hæc est: Ignis mouetur ex vno corpore in aliud. II. Ignis habet densitatem & grauitatem, quod a Boyleo pluribus experimentis demonstratum fuit. III. Lux in motibus suis leges corporum sequitur, quando recta progreditur, reflectitur ac refringitur. IV. Omnia corpora hucusque deprehensa possunt incalescere v. B. DN. KRAFTII *Phys.* P. I. §. 340. V. Omnia hucusque explorata corpora, quando electricitate circumfunduntur, lucem electricam nanciscuntur. v. CEL. MVSCHENBROECKII *Institutiones Physicæ* C. XVII. §. 569. VI. Quædam corpora citius ignem concipiunt quam alia corpora ex. gr. puluis pyrius. VII. Quædam corpora citius aliis lumen spargunt, quod cernitur



tur in experimentis electricis, vbi pro diuersitate corporum, siccorum vel humidorum &c. modo statim, modo tarde vel plane non lux excitatur. VIII. Communiter omnia corpora ignita sunt quoque lucentia & vice versa. IX. Ignis excitatur mutuo corporum attritu, ex. gr. in silicibus chalybe percussis, in axibus rotarum celerius motis, nisi oleo vel aqua illinantur, eoque vel aperto vel occulto, adde & actione solis per refractionem vel reflexionem radiorum aucta. X. Quo vehementior est attritus, eo magis calor augetur; veluti funis lente per manum tractus nullum notabilem calorem efficit, sed rapide per volam compressam ductus, hanc plane lædit. XI. Ad lucem excitandam facit frictio, idque non solum in illis corporibus, quæ per affrictum proprium lucem concipiunt, sed etiam in omnibus corporibus symperielectricis, cum corpore aliquo idioelectrico, frictione agitato, connexis; Sic metalla vitro affricta lumen spargunt. XII. Omnis lux in eodem medio per lineas rectas fertur & sic ad oculum peruenit. XIII. Omne punctum lucidum versus omnes plagas emittit radios. XIV. Datur ignis sine luce. Cochlear argenteum aliquantum calefactum in tenebris non lucet: Sed ei crytalli non lucentes immittantur, extemplo lucere incipient. XV. Datur lux sine igne. Afferendum huc est experimentum collectionis radiorum lunæ per speculum causticum, vnde ne lenissimus quidem tepor oritur, quod jam allegauit BACODE VERVLAMIO l. 5. de *augm. scient.* p. 240.

§. V.

Concludo hinc, ad ignem & lucem requiri primo materiam in omnibus corporibus præsentem, quæ dicitur ignis elementaris & aliis corporibus magis copiose aliis minus copiose inest. Secundo, vt hæc materia ab aliqua causa vel externa vel interna ad motum perducatur, in igne quidem & calore vehementiorem, in luce vero non ita vehementem sed rectilineum & a centro in ambitum sphaeræ propagandum. Quo ipso lux ab igne distinguitur & ignis a luce, cum lucis ex igne propagatio ob particulas heterogeneas interpositas vel aliis ex causis possit impediri.



## §. VI.

Densitas in genere est ratio quantitatis materiæ ad spatium, quo includitur, siue ad volumen ejusdem. Quo maior est massa & quo minus volumen, eo maior existit densitas. Contra quo minor massa & quo spatiosius volumen est, eo minor est densitas. Vnde, si massam dicimus  $M$ , volumen  $V$ , densitatem  $D$ , mensura densitatis in genere hæc est  $D = \frac{M}{V}$ .

## §. VII.

Intensitas igitur lucis est quantitas vis illuminatricis seu materiæ lucis motæ (§. 5.) æstimanda pro magnitudine spatii, quod lumen occupat. Multi radii in exiguo spatio maiorem intensitatem lucis producunt, minorem vero pauci radii in magno spatio. Ad hanc inuestigandam sequenti utar ordine. Primo de eius mensura in genere; Deinde de iis modis, quibus vel a radiis vel a mediis varie determinatur; Tertio de effectibus ab ea in visione pendentibus agam.


## §. VIII.

Mensura intensitatis lucis in genere vel a quantitate & vi luminis in corpore luminoso ipso, vel a distantiiis radiorum ex illo emissorum desumi potest. Quod attinet vim luminis, quatenus e corporibus emicat, hoc fere modo poterit exhiberi. Ut lux alicubi excitetur, subtilissimæ eius particulæ in corporibus delitescences ad motum per aliquod tempus durantem eumque rectilineum sunt perducendæ, ita ut corpus ipsum cum partibus suis maioribus e loco suo moveri non oporteat. Cum vero non nisi corpuscula elastica ad talem motum concipiendum sint idonea, existimandum est particulas lucis & elasticitate præditas esse, & per frictionem tendi. Quod quidem ab experientia in luce deprehenditur, vnde inter fluida elastica numeratur. Quo maior itaque elasticitatis per tensionem vis est in illis particulis, eo fortior lux apparebit. Hoc quoque confirmant experimenta circa electricitatem instituta, in quibus ob maiorem frictionem



frictionem materiæ electricæ vigor deprehensus est maior, vid. B. DN. KRAFTII *Phys.* P. III. §. 338. Quare intensitas lucis hoc respectu est vti factum materiæ lucis in eius elasticitatem.

§. VIII.



Sit punctum luminosum A, quod emittat radios diuergentes AC & AE, vt lumen devehatur per spatium ACE. Quæritur ergo, quomodo se habeant intensitates lucis in diuersis distantiiis AB & AC? Dico has intensitates fore in ratione distantiarum AB & AC duplicata inuersa. Lux e quouis corpore lucente velut e centro in omnem sphæræ ambitum & versus omnes plagas exit. Itaque ratio lucis, quæ cadit in spatium ABD ad lucem quæ cadit in spatium ACE potest repræsentari per circulos BDF & CEG. Iam, vti area circuli BDF ad quadratum diametri suæ, ita area circuli CEG. ad quadratum diametri suæ: Et proportionē non immutata, vti area circuli BDF ad quadratum semidiametri suæ AB, ita area circuli CEG ad quadratum semidiametri suæ AC. Sed areæ circulorum BDF & CEG diuersa materiæ lucis motæ volumina in distantiiis AB & AC exprimunt. Hinc volumen lucis in distantia AB ad volumen in distantia AC, vti  $AB^2 : AC^2$ . Ergo intensitas lucis in AB ad intensitatem lucis in AC, vti  $\frac{M}{AB^2} : \frac{M}{AC^2} = MAC^2 : MAB^2 = AC^2 : AB^2$ .

§. X.



## §. X.

Ex hac mensura constat, quomodo ex cognita ratione distantiae planetarum a sole ratio intensitatis lucis solaris in vnoquoque sit inuenienda abstrahendo tamen a medii qualitate, quod lux permeare potest. Sit enim distantia telluris a sole æqualis 22374 semidiametris terræ & distantia Veneris ab eodem æqualis 15626 semid. terræ. Hinc intensitas lucis in terra ad intensitatem eiusdem in Venere se habebit vti 1:  $\frac{600585876}{244171876}$  siue  $2\frac{28060531}{81042989}$ . Sic ex cognita intensitatum ratione & distantia vnius planetæ inueniri potest distantia alterius. Quærat ex gr. in quamnam distantiam tellus a sole remouenda foret vt diem acciperet septuplo obscuriorem? Hac proportionem instituta, 1:7 vti quadratum distantiae telluris a sole ad quadratum distantiae inueniendæ, & illo posito = 600585876 per regulam trium prodit 4204101132 vnde radix extracta 64839 dat quæsitam distantiam.

## §. XI.

Non possum non hic e regno potentiae in regnum sapientiae transire & Creatoris sapientiam cum bonitate coniunctam celebrare, cum videam intensitatem lucis solaris propter radiorum diuergentiam apud nos ita temperari, vt idem ignis, qui radiis parallelis delatus omnia corpora combussisset & liquefecisset, oculos suauiter pascat & recreet.

## §. XII.

Quia stellæ in immensam fere distantiam a nobis remotæ luce viuida micant, patet, eas ingenti vi illuminatrice præditas esse, & lumen ab iis emissum in medio, per quod fertur, non multum intercipi. Cæterum diuersi earum splendores deriuari possunt, cum ex quantitate vis illuminatricis ipsius, siue ignis ex illis promanantis copia, tum ex diuersa ratione distantiarum a terra.

## §. XIII.

Iam est agendum de variis determinationibus intensitatis lucis spectandis secundum vim radiorum & secundum obstacula  
siue



sive media, quæ lux transit. Radios hic specto vel parallelos vel conuergentes, quia de diuergentibus iam actum fuit §. 9.

§. XIV.

Radii paralleli eandem constanter retinent intensitatem, quia volumen est constans. Quoniam vero radii perfecte paralleli ex vno puncto luminoso non exeunt, quæritur, quinam ad sensum nostrum paralleli haberi possint? Quando duo radii ex vno puncto lucido emissi in planum quoddam ita incidunt, vt angulus, quem apud punctum luminosum efficiunt, sit vnus minuti secundi, tum in hoc plano paralleli haberi possunt; quia oculi nostri ita sunt comparati, vt talem angulum non amplius distinguant. Inuenitur ratio horum radiorum ad planum, quando hoc statuitur = tangenti 1" & alteruter radiorum, qui ad planum angulum rectum efficit = sin. tot. Est vero tangens 1" ad sinum totum vti 48481: 10000000000 secundum RHÆTICI Canonem, vel vti 1: 206266. Licebit hoc theorema ad oculos nostros applicare, & pupillæ diametrum, quæ maxima tenere solet  $\frac{1}{5}$  dig. Rhen. comparare cum isto plano: Et patebit ex indicata ratione punctum a pupilla distans 3437 pedes vel 0, 15 milliariis Germanici, quod assumitur = 22800 ped. Rh. radios in eandem immittere ipsius intuitu parallelos.

§. XV.

Cum sol immensam ignis copiam emittat, facile patet, radios ex eodem exeuntes angulos quoque multo minores quam 1" circa ipsum efficere, adeoque ad aliquot vsque milliaria in planum, quale est diameter pupillæ nostræ, incidere posse pro parallelis habendos.

§. XVI.

Radii conuergentes intensitatem lucis augent in ratione duplicata inuersa distantiarum ab eo puncto, in quo colliguntur. Ratio huius asserti patet ex §. 9. Nam volumina sunt vti quadrata distantiarum, & quo minus est volumen quantitatis illuminatricis, eo maior est intensitas; Contra, quo maius est vo-



lumen eiusdem, eo minor redditur intensitas. Ergo quo maiora sunt quadrata distantiarum eo minor est intensitas & vice versa.

#### §. XVII.

Spectari vero possunt radii conuergentes vel vt reflexi vel vt refracti. De illis in Catoptrica, de his in Dioptrica agitur. Primo aliquid dicam de reflexis. Dicitur radius reflexus ille, qui ab obiecto, in quod fertur, repercutitur, siue id fiat ex collisione cum particulis obiectorum solidis, siue, quemadmodum NEWTONVS statuit, ex viribus quibusdam repellentibus proxime circa superficiem corporum agentibus.

#### §. XVIII.

Illa corpora, quæ lucem illapsam ordinate & sub vna directione communi reflectunt, dicuntur specula. Oportet, vt hæc corpora sint probe læuigata & polita, adeoque lumini minus peruia, quo maiorem vim radiorum reflectant. Hinc in genere intensitas luminis, quod a speculis redditur, est proportionalis ipsorum læuori, & omnia corpora, quæ asperitate & porositate sua lumen suffocant aut absorbent, radiis reflectendis minus sunt idonea. Variæ dantur speculorum species, dantur plana, sphærica, eaque vel conuexa vel concaua, sed ex his ea seligam, quæ radios reflexos reddunt conuergentes, cuiusmodi sunt sphærica caua, quæ ob effectus, quos edunt, nominantur caustica, cum plana non tantum mutant in intensitate lucis.

#### §. XVIII.

In speculis cauis duo considerata sunt. Primo illud spatium, in quod incidunt radii naturales e sole vel alio quodam corpore luminoso delati, quod est area circuli comprehensi circa chordam speculi. Deinde illud spatium, in quod radii post reflexionem coarctantur. Hoc spatium dicitur focus, isque latitudine aliqua præditus est, quia radii reperiuntur non in vnum punctum conuenire possunt, & repræsentatur per circellum in  
dia-



diametro speculi existentem. Conferenda sunt hæc duo spatia, vt ex iisdem tanquam voluminibus ratio vis illuminatricis in vtroque determinari possit. Ita inuenitur intensitatem luminis incidentis ad intensitatem luminis in foco esse vti area foci ad aream circuli circa chordam speculi comprehensi. Cumque sint areæ circulorum vti diametrorum quadrata, patet, easdem intensitates esse in ratione duplicata latitudinum foci & speculi.

§. XX.

Itaque poterit ex datis latitudinibus speculi & foci erui intensitas luminis in foco. Ex. gr. *Vilettius* elaborauit quædam specula caustica, quorum vnum latitudinem 43 poll. alterum vero latitudinem 34 poll. habuisse dicitur. Diameter foci in vtroque fuit 8 lin. quam commodioris calculi causa assumam  $= \frac{1}{2}$  poll. Quibus positis, in primo intensitas luminis in foco 7396 ius superauit eam, quæ erat in circulo circa chordam speculi; In secundo eadem se habuerunt vti 4624 : 1. Problema, quod etiam huc spectat, de inuenienda distantia obiecti alicuius a sole, in qua a radiis directis idem pateretur, quod a reflexis in foco, ex iis, quæ §§. 9. 10. & modo posita sunt non difficulter soluitur. Sit intensitas caloris in aëre  $= 1$ , intensitas foci in speculo Vilettiano secundo  $= 4624$ , distantia telluris a sole  $= 22374$  semid. terræ, distantia quæsitæ  $x$ . Proportio hæc erit,  $4624 : 1 = 600585876 : x^2$ , hinc per regulam trium quæsitæ distantie quadratum prodit, vnde radix extracta dat 360.

§. XXI.

Iam de radiis refractis agendum est. Radius refringitur, quando deflectit a via priori ob diuersam mediorum, quæ transit, densitatem. Modus hic considerandus erit, quo in deflexu a via sua priori radii refracti fiant conuergentes. Id quidem fit per lentes, quare de illis quædam dicenda erunt. Lentes potissimum e vitro probe polito & formam vel sphæricam vel planam habente conficiuntur. De singulis speciebus lentium ex diuersa combinatione formæ sphæricæ & planæ oriundis





dis agere hic non est locus, quia non omnes lentes intensitatem luminis per conuergentiam radiorum augent, sed potius vitra caua eandem propter diuergentiam radiorum, quam efficiunt, imminuunt. Sermo mihi est de conuexis radios ad focum cogentibus.

### §. XXII.

In genere patet, quo maior radiorum copia in eiusmodi lentibus refringatur, & quo angustius fuerit spatium in quod coguntur, eo maiorem prodire intensitatem luminis; Siue quo maiori conuexitatis chorda præditæ fuerint relata ad latitudinem foci. Quod vero amplitudinem & conuexitatem lentium attinet, ab iis, qui vitra caustica confecerunt, obseruatum fuit, conuexitatem lentis non ultra  $20^\circ$  assurgere debere, quia radii sub maiori angulo quam  $10^\circ$  incidentes nimis aberrant, quam ut aliquid ad intensitatem foci conferre possint. Cæterum eæ lentes, quarum arcus est infra  $20^\circ$ , maiorem quoque producent intensitatem, sed omnino difficile est tales conficere ob conuexitatem nimis operosam polituram poscentem.

### §. XXIII.

Augetur intensitas luminis in vitro caustico, si eidem adiungatur aliud, focum prioris excipiens & adhuc magis coarctans. Illud principale, hoc collectiuum vocatur. Ita mirandi effectus præstari possunt, ut quæuis metalla & semimetalla imo fere omnia corpora hucusque explorata liquefiant aut vitrificentur aut in cineres & puluisculos redigantur. In nobilioribus hisce vitris causticis focus a superficie multum remotus esse debet, ut radii incidentes refracti magis conuergant.

### §. XXIV.

Occurrit hic Problema elegans de exhibendo lumine datæ intensitatis ope vitrorum causticorum. Huius solutio fundatur in iis, quæ de mensura generali luminis in radiis conuergentibus allata sunt §. 16. Nempe, lumen accedendo ad focum semper redditur fortius, contra recedendo a foco semper debilius, & quo minor fuerit area circularis, quam lumen occupat,



cupat, eo maiorem illa exhibet intensitatem. Pendet igitur hæc determinatio a magnitudine areæ circularis a lumine occupandæ, quæ ad iustam lucem exhibendam antea in pariete opposito est designanda, vt deinde radii refracti accedendo sensim sensimque ad focus, aut recedendo ab ipso in istum circulum cogantur eundemque repleant. Sit intensitas naturalis  $= d$ , intensitas data maior naturali  $= D$ , diameter vitri caustici  $= a$ , & diameter eius circuli, quem radii condensati explere debent  $x$ , quæ inuenietur hac proportionem instituta  $D : d = a^2 : x^2$ , erit nimirum  $x^2 = \frac{a^2 d}{D}$  &  $x = \frac{a\sqrt{d}}{\sqrt{D}}$ . Res

exemplo est illustranda. Quæritur diameter circuli in pariete ad sistendam lucem decuplo & quadruplo fortiolem luce naturali; posita diametro vitri  $= 500$  partium, hæc erit  $\frac{500}{\sqrt{14}}$  seu 133 harum partium.

### §. XXV.

Opportunum hic erit mentionem iniicere de coloribus oriundis ex luce refracta, qui etiam quadam luminis intensitate gaudent. De horum genesi aliquid præmonendum est. Quilibet radius naturalis ex corpore luminoso exiens repræsentat fasciculum ex pluribus radiolis compositum. Nam radius superficie refringente in loco tenebricoso exceptus, non integer refringitur, sed in plures radiolos diffinditur: Et prismatum vitreorum ope vnicus radius naturalis in 7 colores separatur. Colores autem oriuntur a diuersa refrangibilitate radiolorum in tali fasciculo contentorum & a superficiebus corporum, quæ tenuium instar lamellarum considerantur, exceptorum. Omnes enim eiusmodi lamellæ lucem coloratam refringunt.

### §. XXVI.

Hinc patet primo a radiis crassioribus splendidiores gigni colores, quoniam hi in plures radiolos ab extima corporum superficie excipiendos dimanant: Secundo corpora valde poro-





sa, e. gr. aërem coloribus destitui, quando non satis materiae adest ad radios refringendos, in retiformibus vero, quæ lucem absorbent, gigni nigredinem absentiam lucis indicantem: Tertio illos radiolos, qui in refractione plurimum materiae lucis seruant, gignere colores splendidiore: Quarto debiliores oriri colores, quando radius a superficie refringente subtilius diuiditur. Itaque, cum colores ratione intensitatis suæ se hoc ordine subsequantur, vt primo loco veniat ruber, deinde aureus & reliqui, flauus, viridis, cæruleus, indicus, violaceus, in rubro erit copiosior materia lucis quam in aureo, & sic porro.

### §. XXVII.

In mediis, quæ lux transit, duas qualitates obseruare licet intensitatem luminis mutantes, densitatem & pororum luci patentium quantitatem & dispositionem. Medium densum & multiplices pororum anfractus habens luminis transitum impedit: Contra quo frequentiores & simpliciores ostendit meatus eo plus lucis transmittit. Quare intensitates lucis in diuersis mediis sunt in ratione porositas secundum lineas rectas patentis directa & densitatis inuersa. Sit densitas seu massa =  $M$ , porositas =  $P$ , & quantitas obstaculi erit vti  $\frac{M}{P}$ . Hanc mensuram ad eam, quæ §. 9. tradita est, ita applico, vt intensitates superstites post decursum medium in distantiis  $AB$  &  $AC$  dicam esse vti  $AC^2 - \frac{MAB^2}{P} : AB^2 - \frac{MAC^2}{P}$ .

### §. XXVIII.

Atmosphæra nostra est eiusmodi medium, quod lumen a sole profectum debilitat. Nam per aërem lucem minui ex eo apparet, quia radii in cameram obscuram immissi tramitem lucidum visibilem efficiunt, qui certe oritur ex luce ad oculos versa per reflexionem in particulis aëreis, adeoque imminuta. Porro lumini nocent copiosi vapores & halitus in atmosphæra detenti,



detenti, quod ex debili iubare solis & inefficacia speculorum vitrorumque causticorum facile colligitur. Hinc *Homborgius* speculi sui vistorii vires lapsas esse deprehendit in æstate calida 1705. Hinc fere per integrum annum

Sol caput obscura nitidum ferrugine texit. VIRGIL. GEORG. I. I.

### §. XXVIII.

Cum radiis lucis ad oculos pertingentibus visio peragatur, dispiciam, quales effectus a diuersa intensitate lucis in visione nascantur. Intensitas lucis, quemadmodum a nobis sentitur, exserit se in diuersis illis modis, quibus fibrillæ nerueæ retinæ adficiuntur, pendentibus a constitutione totius oculi. Quo plures enim radii in retinam perueniunt, eo fortius illius fibrillæ nerueæ adficiuntur, eoque maior intensitas lucis sentitur. Hinc, vt oculus lucem bene sentiat, requiritur primo vt pupilla sit ampla ad excipiendos plures magisque diuergentes radios. Secundo vt humores oculi sint pellucidi, & radios bene refringant, itaque cornea & lens crystallina debent esse gibbiflores. Tertio, vt retina sit sana & tenera, & nervus opticus bene constitutus. vid. *MVSCHENBROECKII Institut. Phys.* c. XXXIV. §. 1226.

### §. XXX.

Multum ad distinctam visionem facit, vt intensitas lucis ab obiectis manantis sit eadem vsque dum oculos ferit. Talis autem effectus a radiis parallelis proficiscitur, de quibus §§. 14. 15. actum est. Quare, si radii e diuergentibus reddi possunt paralleli, visio multum iuuatur. Hoc vero præstant lentes vitreæ microscopia dictæ.

### §. XXXI.

De radiis conuergentibus experientia constat eos visioni plurimum nocere, præsertim vbi valde coarctantur, quia humores ad videndum necessarios in oculo exsiccant, & neruum opticum





opticum nimis acriter conuellant. Illa quoque corpora, quorum superficies multa parua specula continet, copiosa radiorum reflexione oculos lædunt. Ita Democritus clypeo æneo contra solem posito aciem oculorum sibi retudisse legitur; & milites Xenophontis e nimia niuis refulsione graues noxas contraxerunt.

### §. XXXII.

Radiorum refractorum non conuergentium intensitas lucis iucundissimam se exhibet in visione, & maxime delectat animos hominum. Ita enim comparati sunt, vt vibrationes in retina excitent suaui & musica harmonia concinentes. Prouti radius refractus est densior ratione materiæ lucis ita celeriores excitat vibrationes. Verum, quo subtilior fuerit, eo tardiores fiunt vibrationes. Quare in rubeo colore viuidissimæ sunt vibrationes, sed violaceus color admodum lentas habet, quia lumen habet tenue. Hinc color viridis oculos nostros tam salubriter afficit, quia medium tenet inter colores adeoque moderate neruos exercet.

### §. XXXIII.

Limites, quibus me temporis angustia circumscripsit & ampliorem apparatus prohibent & hic finem facere cogunt. Gratus profiteor me in plerisque instructum fuisse a B. DN. PROF. KRAFTII Physica. Illorum vero quæ manca sunt & hiant apud æquos Lectores & Sapientes veniam oro, DEVM precatus, vt hæc paucula & tenuia sinat cedere in SVI gloriam.

---

PRAESTANTISSIMO DOMINO CANDIDATO  
AVTORI HVIVS DISSERTATIONIS  
PRAESES S.

Optime egisti, Domine Candidate, quod consilia & principia Beati Dn. Prof. Krafftii, Magistri Tui, secutus dissertationem hanc physico-mathematicam elaborasti. Elucet exinde ingenium tuum ad hoc studiorum genus aptum. Perge in scientiis hisce exercere tuam industriam olim suis præmiis coronandam. Vale!









